

SAMÞYKKT

um búfjárhald í Borgarbyggð.

1. gr.

Samþykkt þessi er sett til að tryggja skipulag, stjórn og eftirlit með búfjárhaldi í Borgarbyggð, koma í veg fyrir ágang á lóðir íbúanna og til verndar gróðri í sveitarfélaginu.

2. gr.

Búfjárhald, s.s. nautgripa, hrossa, svína, sauðfjár, kanína, geitfjár, loðdýra og alifugla, er heimilt á lögbýlum í Borgarbyggð. Umráðamenn búfjár sem haldið er á lögbýlum þurfa ekki að sækja um leyfi til búfjárhalds. Búfjárhald utan lögbýla er leyft í sérstaklega skipulögðum hverfum eða á grundvelli samþykktar þessarar að fengnu samþykki sveitarstjórnar. Þó er takmarkað búfjárhald heimilað samkvæmt gildandi deiliskipulagssamþykktum í hesthúsaðverfum í Borgarnesi og á Hvanneyri án leyfis. Um örugga vörslu graðpenings gilda ákvæði laga nr. 38/2013 um búfjárhald.

Liggja þarf fyrir samþykkt byggingarleyfi skv. byggingarreglugerð nr. 112/2012 fyrir það húsnæði sem nota skal til búfjárhaldsins.

3. gr.

Sá sem stunda vill búfjárhald utan lögbýla, sbr. 2. gr., skal senda skriflega umsókn til Borgarbyggðar á þar til gerðu umsóknareyðublaði. Í umsókninni skal gera grein fyrir fjölda búfjár, sem halda skal, tegund þess, hvaða húsnæði og land sé til umræða og öðru sem máli kann að skipta um öryggi þess og vörslu. Heimilt er að halda allt að 10 hænsni á lóð hverju sinni. Þó eru hanar með öllu bannaðir utan lögbýla. Hænsnin skulu vera í öruggu aðhaldi sbr. 4. gr. samþykktar þessarar.

4. gr.

Telji sveitarstjórn að umsækjandi uppfylli þau skilyrði sem krafist er veitir hún leyfi til búfjárhalds. Leyfisveiting búfjárhalds skuldbindur þó Borgarbyggð ekki til að sjá búfjáreigendum fyrir beitalandi handa búfé né leggja þeim til aðra aðstöðu til búfjárhalds. Með leyfi öðlast sauðfjáreigendur þó rétt til upprekstrar sauðfjár á þeim afrétti Borgarbyggðar sem við á samkvæmt gildandi fjallskilasamþykkt.

Leyfi til búfjárhalds er veitt til ótilgreinds tíma en er uppsegjanlegt með hálfis árs fyrirvara. Leyfið er háð gildandi lögum og reglum um búfjárhald eins og þær eru á hverjum tíma og er gefið út á nafn og er ekki framseljanlegt. Sá sem fær leyfi til búfjárhalds samkvæmt samþykkt þessari skal hafa búféð í öruggri vörslu og ber hann að öllu leyti ábyrgð á því.

Þegar leyfið er veitt skal upplýsa leyfishafa um gildandi reglur um búfjárhald.

5. gr.

Umhverfis- og landbúnaðarfulltrúi heldur skrá yfir lönd í eigu sveitarfélagsins, sem leigð eru til beitar og/eða slæгна. Þeir búfjáreigendur eða félagasamtök sem hafa land á leigu frá sveitarfélaginu skulu hafa landið girt gripheldri girðingu, sem nauðsynleg er til vörslu þeirra gripa sem innan hennar eiga að vera, samanber reglugerð um vörslu búfjár nr. 59/2000.

Umsóknir um land til beitar eða slæгна skal senda til sveitarstjórnar sem úthlutar landi samkvæmt tillögu umhverfis-, skipulags- og landbúnaðarnefndar. Einstaklingar og félög búfjáreigenda, sem hafa lönd í eigu sveitarfélagsins á leigu til beitar eða slæгна skulu viðhalda gróðri landsins og leitast við að efla hann, meðal annars með árlegri áburðargjöf. Í leigusamningi fyrir beitar- og slægjulönd eru tilgreindar reglur um umgengni við landið.

6. gr.

Sé búfé haldið á lögbýli þar sem ekki er föst búseta, skal umráðamaður þess tilnefna tilsjónarmann sem fylgist með aðbúnaði og ástandi búfjárins sbr. lög nr. 55/2013 um velferð dýra. Verði ekki orðið við þeirri kröfu eða ef tilsjónarmaður sinnir ekki starfi sínu er sveitarstjórn heimilt að láta fjarlægja búféð á kostnað eiganda þess sbr. samþykktu gjaldskrá. Jafnframt ber umráðamaður búfjár kostnað ef um fóðrun er að ræða. Kostnaður er tryggður með lögveði í búfénu. Umráðamaður búfjár skal tilkynna nafn tilsjónarmanns til sveitarstjórnar fyrir 1. nóv. ár hvert.

7. gr.

Allar lögskipaðar læknismeðferðir á búfénaði, s. s. garnaveikibólusetning, skulu framkvæmdar á ábyrgð og kostnað umráðamanns búfjár. Umráðamanni búfjár er skylt að merkja búfé sitt samkvæmt reglugerð nr. 916/2012.

8. gr.

Um fjallskil af búfé og landi í Borgarbyggð fer eftir lögum nr. 6/1986 um afréttamálefni, fjallskil o.fl., með síðari breytingum, svo og ákvæðum í gildandi fjallskilasamþykktum með síðari breytingum.

9. gr.

Óheimilt er að halda búfé, nema þar til gerður húsakostur sé í samræmi við reglugerðir um aðbúnað búfjár. Sama gildir um allt umhverfi húsanna.

Umráðamaður búfjár ber ábyrgð á því að hann hafi beutiland og fóður fyrir búfé sitt og skal hann tryggja góða meðferð þess skv. lögum nr. 55/2013 um velferð dýra. Séu fyrrgreind skilyrði ekki uppfyllt hefur sveitarstjórn heimild, að fengnum tillögum Matvælastofnunar, til að banna dýrahald á tilteknum stöðum sbr. lög nr. 55/2013 um velferð dýra.

10. gr.

Lausaganga búfjár er bönnuð innan þéttbýlismarka Borgarbyggðar. Mörkin eru samkvæmt gildandi aðalskipulagi hverju sinni. Ennfremur geta þeir, sem fyrir ágangi verða innan þéttbýlismarka, tilkynnt það sveitarstjórn sem hefur forgöngu um að láta handsama ágangsféð. Umráðamaður búfjár ber allan kostnað af handsömun og fóðrun skv. gjaldskrá Borgarbyggðar. Kostnaður er tryggður með lögveði í búfénu.

11. gr.

Ætli landeigandi að friða afmarkaða landspildu fyrir ágangi búfjár skal hann tilkynna sveitarstjórn það. Jafnframt skal landeigandi framvísa umsögn Búnaðarsamtaka Vesturlands þar sem fram kemur að girðing um spilduna sé gripheld þannig að friðun sé raunhæf. Sveitarstjórn skal auglýsa í Stjórnartíðindum umrædda friðun. Umráðamaður lands skal fyrir 15. júní ár hvert framvísa til sveitarstjórnar umsögn Búnaðarsamtaka Vesturlands um að vörslulínan sé fullnægjandi, að öðrum kosti fellur friðun úr gildi. Landeigandi ber allan kostnað af úttektinni.

12. gr.

Komist búfé inn á friðað svæði, sbr. 11. gr., skal umráðamaður lands ábyrgjast handsömun þess og koma því í örugga vörslu. Skal hann þá þegar kanna hver er réttur umráðamaður að hinu handsamaða búfé og tilkynna honum þegar í stað hvar búféð er. Hafi umráðamaður búfjár ekki fundist eða sinnt fyrirmælum um að sækja búféð innan tveggja sólarhringa frá tilkynningu er umráðamanni lands heimilt að afhenda sveitarfélaginu búféð. Umráðamaður

búfjár ber kostnað af handsömun búfjárins samkvæmt gildandi gjaldskrá. Umráðamaður lands ber ábyrgð á því að búfé hafi nægilegt fóður og vatn á meðan það er í vörslu hans. Sveitarstjórn og umráðamaður lands eiga lögveð í búfénu fyrir sannanlegum kostnaði skv. lögum um búfjárhald nr. 38/2013.

13. gr.

Bygging gripahúsa annarra en hænsnakofa er einungis leyfð á ákveðnum svæðum innan þéttbýlismarka sem skipulögð eru fyrir búfjárhald. Byggingarleyfi fyrir hænsnakofa er háð gildandi ákvæðum byggingarreglugerðar, með síðari breytingum. Þau gripahús sem fyrir eru í sveitarfélaginu utan bújarða og svæða sem ekki eru ætluð til búfjárhalds samkvæmt aðalskipulagi, skulu fjarlægð þegar sveitarstjórn ákveður slíkt, með eins árs fyrirvara. Óheimilt er að byggja við þau eða endurbyggja án tilskilins byggingarleyfis. Gæta skal þess að þau líti vel út.

14. gr.

Brot gegn samþykkt þessari varða sektum. Með mál út af brotum skal farið samkvæmt ákvæðum laga um meðferð sakamála nr. 88/2008.

15. gr.

Samþykkt þessi, sem samin er og samþykkt af sveitarstjórn Borgarbyggðar, staðfestist hér með samkvæmt 4. gr. laga nr. 38/2013, um búfjárhald o.fl., með síðari breytingum, til þess að öðlast gildi þegar í stað og birtast til eftirbreytni öllum þeim sem hlut eiga að máli.

Ákvæði til bráðabirgða

Þeir sem við gildistöku þessarar samþykktar eiga eða hafa í umsjá sinni búfé sem fellur undir ákvæði til leyfisveitingar skulu sækja um leyfi til búfjárhalds til sveitarstjórnar innan tveggja mánaða frá gildistöku samþykktarinnar.

Atvinnuvega- og nýsköpunarráðuneytinu, xx xxx 2014.

F. h. sjávarútvegs- og landbúnaðarráðherra,

Halldór Runólfsson.

Rebekka Hilmarsdóttir.